

tiako bulegoko neskak kopiak ateratzeko. Berrondo jaunaren eskuetan uzten dira.

Beobide'k «Hegosa»ren izenean, ikastoletarako textoak argitaratzeko gertu daudela gogorazten du. Ortarako izendatua dan batzordearekin mintzatzeko esan zaio.

Oi dan otoitzarekin bukatu da batzarra.

Euskaltzainburua
MANUEL LEKUONA

Idazkaria
JUAN SAN MARTIN

1968 - VI - 28

Donostian, Gipuzkoako Diputazioan, 1968-ko garagarrillaren 28-an, goizeko amarterdian.

Bildu dira: Manuel Lekuona buru, Joan Haritschelhar buru-ordezko, A. Damaso Intza-koa, Irigaray, Irigoyen, Lafitte, Larzabal, Villasante, Zabala euskaltzain jaunak; eta Franziska Arregi, Baztarrrika, Beobide, Berrondo, Fernández Setién, Garmendia (Jon), Goikoetxea (Iñaki), Lizundia, Olaizola, Oñatibia, Oregi, Zatarain eta Zugasti euskaltzain laguntzaille jaunak, San Martin idazkari dala.

Arrue, Dassance, Diharce, Eppherre, Labayen eta Satrustegi euskaltzain jaunak ezin etorria adierazi dute.

Oi dan otoitzarekin asi da biltzarra.

Maietzeko billerako agiria ontzat artu da.

A. Plazido Mujika'k, A. Goikoetxea'rekin eskuz-esku bialdu du Loiola'ko artxiboetan zuten Azkue zanaren *Latsibi* nobela argitaratzera eramateko. A. Plazido Mujika'ri eskerrak ematea erabagi da lan au utzi digulako.

Tene Mujika euskal idazleari omenaldia egin zaio Deban, eta Euskaltzaindiaren izenean zorionak eman zaizkio.

Jesús González San Pedro'ren karta bat artu da Madrildik, esanaz, ango Unibersidadean estudiatzen dauden Euskalerriko semeak, udarako oporraldiak aprobetxatuaz, illabeteko euskera ikastaroa egin nai dutela Gabiriako Aita Pasiotarren etxean, eta ortarako legearen aldeko baimena ia Euskaltzaindiak bere gain artu lezakean. Ontzat artua izan da eta Información y Turismo'ri eta Gipuzkoako Gobernu Zibillari baimena eskatzea erabaki da.

Bizkaiko Diputazioak, Euskaltzaindiaren urre-etzaietarako 25.000 pezetako sari berezia eman du. Eskerrak eman bekioz.

Idazkariak aditzera eman du Real Academia Gallega'koekin ar-emanen jarri dala. Aurtengo literatura sarien berriak zabaldu dira euskal aldizkarietan.

Arrue jaunak gaztigatu du, Korteetan, Gallegu ta Katalanekin batean aurrera eramateko asmoetan dirala bilinguismoaren kanpaña.

Beobidek, urre-etzai erakunderako izendatu zan batzordearen izenean, Oñatiko aiuntamentukoekin erabagi duten programa aurreratu du. Oraingoan, au da asmoa: Iraillaren 23-an, astelena, Euskaltzaindikoekin lehen billera Biltzar nagusiari buruz; 24-an, asteartea, Villasante'ren itzaldia, Oñatiko euskalkiari buruz A. Kandido Izagirre zanak egin zuen lana aurkeztuz; 25-ean, asteazkena, itzaldia euskal arteari buruz (bear bada Arrazola monjak emana); 26-an, osteguna, aurren eguna (ikastoletako aurrak); 27, ostirala, teatru eguna; 28-an, larunbata, kantu eguna (kanta zaarrak eta «Ezdok amairu»); 29-an, igandea, Euskaltzaindiak literatura euskeraren batasunari buruz artzen dituan erabagien berri ematea, ta dantza eguna (autoktono talde batzuek agertuaz), eta egun bereko arratsaldean bertsolariak: Basarri, Uztapide, Xalbador, Lazkao-txiki, Lopategi eta Arozamena, ta gaiñera erri-meza bat izango da.

Literatura euskeraren batasunerako izendatua dan batzordeak, bere lanak bear bezala aurreratu aal izateko, bear diran egunetan tokiren batean alkartzea pentsatu da.

Beobidek eskatzen du zenbait itzaldi gertatu bear lirakela erria eta euskeltzaleen artean giroa zabaltzeko literatura euskeraren batasunaren premia adieraziz.

Baztarrika'k adierazi du Gasteizko batzarra, oraingoan, atzeratzea komeni dala Diputazioko presidenterik ez dutelako. Bear bada urrillean edo azaroan egin ditekeala. Urrillean Gasteizen egitera Baionakoa atzeratuko da urtarrillerako (ilbeltzerako, 1969).

Olaizola jaunak adierazten du *Zigor* euskal opera Madrillen agertzea pozgarria izan dala, eta komeni dala bere egille diran Lekuona euskaltzain-buruari eta Eskudero jauneri zorionak ematea. Ontzat artzen da eta bijoaz gure zorionak.

Lafitte'k gertatutako iztegi-labur-berezia, Berrondok presentatu du multikopiaz aterea, ta Euskaltzaindikoekin artean zabaltzen da.

Lafitte jaunak, bere aldetik, iztegi labur-berezi orrek duan asmoa adierazi du. Bear-bearrezko itzak indartu ta gaiñerakoak baztertzen alegindu. Ortaz, Frantzia XVII-garren mendean artu ziran erabagien berri eman du. Itz gutxikin gauza asko esateko bidera jo bear dugula, erriaren izkuntza biziari urreratuaz. Oñarri onetatik premiazkoen 5.000 itzeko iztegi bat osatu bear dugula.

Pakita Arregi'k ikastoletarako andereño ta andereño laguntzailleendako agiriak gertatzea komeni dala dio. Euskaltzaindiari derizkion muga batzuek jarriaz euskeraz erakusteko gauza dala adieraziko duena. Era orretan eskari bat gertatzea, bearko diran baldintzak adieraziz, andereño beraien esku uzten da.

Zatarain'ek C. Santamaria euskaltzain laguntzaillearen semearen il-berria eman du. Gure dolumiñak agertzea erabaki da.

Oi dan otoitzarekin bukatu da biltzarra.

Euskaltzainburua

MANUEL LEKUONA

Idazkaria

JUAN SAN MARTIN

1968 - VII - 26

Donostian, Gipuzkoako Diputazioan, 1968-ko uztaillaren 26-an, goizeko amarterdian.

Bildu dira: Manuel Lekuona buru, Jean Haritschelhar buru-ordezko, Isaak Lopez-Mendizabal euskaltzain ohorezkoa, A. Intza'-koa, Irigaray, Irigoyen, Labayen, Lafitte, Larzabal, Mitxelena, Villasante eta Zabala euskaltzainak; Artola «Bordari», Beobide, Berrendo, Karmele Esnal, Etxaniz, Etxeberria, Etxenagusia, F. Setien, Garmendia (Jon), Garmendia (Salbador), Goikoetxea-Maiza (Joan), Olaizola, Oregi, Santamaria eta Zatarain euskaltzain laguntzailleak. Xabier Mendiguren Gabirian egiten ari diran udarako euskera ikastaroen mandatari bezela, San Martin idazkari dala.

Arrue, Dassance, Eppherre, Diharce, Baztarrika, Lizundia eta Oñatibiak ezin etorria adierazi dute.

Oi dan otoitzarekin asi da biltzarra.

Garagarrilleko billerako agiria ontzat artua izan da.

Aita Baztarririk gaztigatu du Arabako billera urrillerako autatzen dutela. Beraz, Baionan urrillean egiteko zana urtarrillerako (ilbeltzerako) atzeratzen da.